



Sud Bosne i Hercegovine
Суд Босне и Херцеговине

Broj: S1 3 Iž 037663 20 Iž
Sarajevo; 16.10.2020.godine

Sud Bosne i Hercegovine, u drugostepenom vijeću sastavljenom od sudija Vesne Trifunović kao predsjednika vijeća, Dinke Bešlagić-Čovrk i Srete Crnjak kao članova vijeća, odlučujući o žalbi Jotić Ilije, Stanari, Cerovica bb, izjavljenoj protiv Odluke Centralne izborne komisije Bosne i Hercegovine broj 05-1-07-1-997/20 od 01.10.2020. godine o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 16.10.2020. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine broj i datum navedeni u uvodu, utvrđen je i objavljen broj birača upisanih u izvod iz Centralnog biračkog spiska za glasanje izvan Bosne, ukupno 101.771 birača.

Protiv ove odluke žalbu je uložio Jotić Ilija navodeći da se nikada nije prijavio da glasa izvan BiH, te da je neko iskoristio njegove lične podatke bez njegove dozvole.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbaci, odnosno odbije kao neosnovana jer u konkretnom slučaju Centralna izborna komisija BiH, imajući u vidu činjenicu da je za žalitelja dostavljena prijava koja ispunjava uslove za upis u izvod iz Centralnog biračkog spiska za glasanje izvan Bosne i Hercegovine iz Srbije.

Pored navedenog istaknuto je da će žalitelju biti omogućeno da glasa nepotvrđenim kovertiranim gasačkim listićem na redovnom biračkom mjestu određenom prema njegovom mjestu prebivališta, a da će CIK BiH u Glavnom centru za brojanje izuzeti glasački materijal dostavljen od žalitelja i isti neće biti prebrojan u cilju sprečavanja zloupotrebe biračkog prava i omogućavanja ostvarivanja biračkog prava biračima kojima ono zaista pripada.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu, Centralna izborna komisija BiH (CIK BiH) je, prije donošenja ožalbene odluke, a prilikom razmatranja prijave na ime žalioca Jotić Ilije,

utvrdila da je dostavljen obrazac prijave za glasanje izvan BiH za Jotić Iliju , uz koji je dostavljena kopija važeće lične karte izdate od MUP RS za imenovanog. S obzirom da je prijava za glasanje izvan BiH ispunjavala sve uslove propisane odredbom člana 3.15 Izbornog zakona BiH, žalilac Jotić Ilija se nalazi na izvodu iz Centralnog biračkog spiska za glasanje izvan BiH iz Republike Srbije.

U cilju potpunog i pravilnog utvrđenja činjeničnog stanja, imajući u vidu da je navedena žalba dostavljena putem e-maila i da ista nije potpisana, te da uz istu nije dostavljen dokaz kojim bi se potkrijepili navodi iz žalbe, Centralna izborna komisija je zaključila da se radi o zloupotrebama biračkog prava.

S obzirom na ovakvo činjenično stanje, u cilju utvrđivanja vjerodostojnih činjenica o identitetu žalioca, neosnovanom se ukazuje i žalba žalioca.

Naime, u konkretnoj situaciji nesumnjivo se radi o zloupotrebi biračkog prava, međutim, Centralna izborna komisija BiH na osnovu raspoloživih činjenica nije bila u mogućnosti utvrditi ko je počinio zloupotrebu biračkog prava za glasanje izvan BiH, jer je zloupotreba mogla biti učinjena, kako od strane žalioca, tako i od strane trećih lica. Međutim, u svakom slučaju žalilac će biti u mogućnosti da iskoristi svoje biračko pravo i da po želji glasa na svom redovnom biračkom mjestu određenom prema njegovom mjestu prebivališta.

Naime, žalioću će, ukoliko na dan Lokalnih izbora 2020. godine, dođe na redovno biračko mjesto određeno prema njegovom mjestu prebivališta, biti omogućeno da glasa nepotvrđenim kovertiranim glasačkim listićima (član 5.18 Izbornog zakona BiH) koji će biti potvrđeni i prebrojani u Glavnom centru za brojanje, s tim što će Centralna izborna komisija BiH u Glavnom centru za brojanje izuzeti glasački materijal dostavljen eventualno i iz inostranstva na ime žalioca i isti neće biti ponovo prebrojan, a sve u cilju sprečavanja zloupotreba biračkog prava i omogućavanja ostvarivanja biračkog prava biračima kojima ono zaista pripada.

Prema odredbi člana 5.18 Izbornog zakona BiH, ako se ime birača ne nalazi na izvodu iz Centralnog biračkog spiska zato što se birač upisao u Centralni birački spisak da glasa izvan zemlje, a vratio se da glasa lično u Bosni i Hercegovini, njegovo ime dodaje se na poseban obrazac koji sadrži sve podatke kao i izvod iz Centralnog biračkog spiska. Birač se potpisuje na izvod i ima pravo glasati nepotvrđenim-kovertiranim glasačkim listićem, u skladu sa odredbama ovog zakona.

S obzirom na navedeno apelaciono vijeće je ocijenilo da se pobijanom odlukom Centralne izborne komisije BiH ne povređuje biračko pravo žalioca.

Iz navedenih razloga apelaciono upravno vijeće ovog suda nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu primjenom odredbe člana 81. stav 1. druga rečenica, Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

**PREDSJEDNIK VIJEĆA
SUDIJA
Vesna Trifunović**